

21 AUG 2002

Gerbang/I

THAILAND, KEMBOJA DAN LAOS SETUJU SERTAI GERBANG MAKLUMAT

PHNOM PENH, 21 Ogos (Bernama) -- Kementerian Penerangan Malaysia pada dasarnya telah menerima persetujuan Kemboja, Laos dan Thailand untuk menyertai Gerbang Maklumat Selatan-Selatan (SSIG), yang dicadangkan untuk ditubuhkan.

Ini adalah hasil lawatan sekumpulan pegawai-pegawai kanan kementerian ke ketiga-tiga negara itu sejak 13 Ogos lepas untuk mengemukakan idea mengenai SSIG itu kepada Phnom Penh, Vientiane dan Bangkok serta mendapatkan komitmen mereka ke arah merealisasikan penubuhan gerbang maklumat itu, yang akan berpangkalan di dan dibiayai oleh Kuala Lumpur.

"Misi ini amat berjaya dan telah mencapai matlamatnya," kata Timbalan Menteri Penerangan Datuk Khalid Yunus, yang mengetuai rombongan itu, kepada Bernama pada akhir lawatan sebelum berlepas pulang ke Kuala Lumpur hari ini.

Semasa di sini, Khalid mengadakan rundingan mengenai cadangan penubuhan SSIG dan membincangkan draf Memorandum Persefahaman mengenai gerbang maklumat itu dengan Menteri Penerangan Kemboja, Lu Lay Sreng.

Duta Besar Malaysia ke sini Datuk A.H. Anuar turut menyertai perbincangan itu selain para pegawai penyiaran dan agensi berita Malaysia dan Kemboja.

Khalid juga mengadakan perbincangan serupa dengan rakan sejawatannya di Laos, Phanduangchit Vongsa. Perbincangan itu turut disertai Duta Besar Malaysia ke Vientiane, Daud M Yusoff.

Terdahulu, di Bangkok, Menteri di Jabatan Perdana Menteri Thailand Somsakdi Thepsuthin memberitahu Khalid mengenai sokongan Bangkok terhadap penubuhan SSIG selain membangkitkan apa yang dianggap sebagai kos penghalang dan undang-undang terbatas Malaysia yang menjejaskan promosi filem asing.

Dengan Vongsa menyatakan hasrat Laos menjalani latihan dan mengalu-alukan pelaburan sektor swasta Malaysia dalam pembangunan infrastruktur penyiaran di negaranya, Lay Sreng pula berharap wartawan dan penyiar Kemboja akan mendapat lebih banyak biasiswa di bawah SSIG.

Kuala Lumpur berharap dapat memulakan operasi SSIG sebagai pusat pertukaran program berita dan televisyen bagi negara-negara selatan pada awal 2003.

Penubuhan SSIG, yang diilhamkan oleh Perdana Menteri Datuk Seri Dr Mahathir Mohamad, dicadangkan pada Dialog Antarabangsa Langkawi 1999.

-- BERNAMA

RYN RYN NAK